



Inatsisartuni ilaasortaq Kristian Jeremiassen Siumut  
MAANI

26. apr 2011  
Sagsnr. 2011-048880  
Dok.nr. 615368

**Qaleralinnik tunisassioriaatsit, tunisinermi ilitsersuutit umiarsuarnillu  
tunitsiviliinissamik qinnuteqaatit pillugit apeqqut nr. 93-2011-mut akissut**

Postboks 269  
3900 Nuuk  
Tlf. (+299) 34 50 00  
Fax (+299) 32 47 04  
E-mail: apnn@nanoq.gl  
www.nanoq.gl

Inatsisartut suleriaasianni § 37 imm. 1 naapertorlugu qaleralinnik tunisassioriaatsit,  
tunisinermi ilitsersuutit umiarsuarnillu tunitsiviliinissamik qinnuteqaatit pillugit  
Naalakkersuisunut apeqquteqarputit. Apeqqutit uannit akisassanngortinneqarput.

**Naalakkersuisunut Apeqqut:**

1. Nunatsinnit qalerallit 15.000 tons-it 2009-imi suliarinagit annissuutat suliffissaqartitsisussaagaluartut pillugit Naalakkersuisut pilersaaruteqarpat nunatsinni suliarineqartalermissaannik?
2. Suliniuteqartoqarpat qaqagu tamanna piviusungussava?
3. Uummannap eqqaani ukioq manna qaleralinnik tunisinissamat ullormut kg-lut qassit tunissaneraat aaliangersaasoqaramiuna?
4. Ullormut tunisassat aalajangersorneqarmerinut pissutaava uummannap eqqaani qaleralinnik sinniilluni aalisartoqannginissaa?
5. Upernaviup eqqaani umiarsuarmik tunitsiviliinissamat ukioq manna qinnuteqartoqarpa?
6. Naalakkersuisut ilisimatitsissutigisinnaavaat kikkullu qinnuteqarsimanersut?
7. Ukiut siuliini 2010 2009-milu upernaviup eqqaani umiarsualiinissamat qaleralinnut tunitsivimmik qinnuteqartoqartarsimava?
8. Qinnuteqartoqartarsimappat sooq upernaviup eqqaani umiarsualiinissamat itigartinneqartarpat?
9. Uummannap eqqaani qaleralinnut tunitsivissamik umiarsualiinissamat ukioq manna pilersaaruteqartoqarpa?

**Akissut:**

Apeqqut 1 aamma 2-mut

Tunitsiviit ingerlatseqatigiiffittut ingerlanneqartut piginnittuisa aalajangigassaraat aalisakkat tulaassorneqartut qanoq tunisassiarineqartassanersut. Naalakkersuisut isumaqarput ingerlatseqatigiiffiit aalisakkanik naammassillugit tunisassioartarnissaminut tunngavissaqarluarlutillu kajumissuseqartariaqartut, taamaasiornikkummi aalisakkat nalituninngortinneqarsinnaammata.

Tassunga tunngatillugu assersuutigineqarsinnaavoq Royal Greenlandip 2008-mi qaleralinnik tunisassioernerminik Qasiagiannuani aalisakkanut tunisassiofimmuut eqiteruttitsinissaminik aalajangernerera. Tamanna ingerlanneqartarpoq qaleralinnik sikulersukkanik Ilulissaniit Qasiagiannuanut assartuisoqartarneratigut, taamaasiortoqarneratigut qalerallit tulaanneqartussaataasut tamakkerlugit Qasiagiannuani tunisassiarineqartalerlutik. Royal Greenlandip 2010-mi pilersaarut

aallartippaa siunertarineqarluni qalerallip tamackingajallugu tunisassiarineqartalernissaa aammalu sapinngisamik Kalaallit Nunaanni tunisassiarineqartarnissaa anguniarlugu.

Qasigianguani, Uummannami Ikerasammilu tunisassioriaatsit nutarterneqarput tassani siunertarineqarluni tunisassiat nalitunerulernissaat. Royal Greenland naapertorlugu tamatuma kinguneraa aalisakkanut suliffissuarni pingasuusuni qalerallit ataasiakkaat 90 %-iisa missaasa tunisassiarineqartalernerat.

Aalisakkalli qanoq annertutigisumik tunisassiarineqartarnissaat eqqarsaatigalugu pissutsit assigiinngitsut apeqqutaasarput, tamanna aamma illit nammineq siusinnerusukkut apeqqutigisannut 229-2010 akissutinni erseqissaatigereenikuuara. Tassanimi apeqqutaalersartut tassaammata sulisussaqaarniarneq aammalu pisisartut assigiinngitsut kissaataat. Ilutigalugu akissuteqaatiga 14. december 2010-meersoq innersuussutigissavara.

Apeqqut 3 aamma 4-mut

Ilumoorpoq ingerlatseqatigiiffiit tunitsivinnik ingerlatsisut ilaatigooriarlutik tulaanneqarsinnaasunik annertunerpaaffilersuisariaqartarmata. Pissutsit taamaannerat Naalackersuisut sunniuteqarfigisinnaanngilaat. Ingerlatseqatigiiffiit ataasiakkaat namminneq aalajangigassaraat tulaassinermi maleruagassiortariaqassanerlutik, taamaasiortoqartillugulu tamakku pisortanit akuleruffigineqarneq ajorput.

Taamaattumik tulaanneqarsinnaasunik annertunerpaaffilliilluni killilersuisarsinnaanerit tunisinermi ilitsersuutit aqutugalugit aalajangersarneqartartut qaammatit pingasukkaarlugit pisassiisalernissamut pisassiissutinik atuinissamut pingaarnerusutigut sinaakkutassiisussanut kapitartuunneqassanngillat. Qaammatit pingasukkaarlugit pisassiisalernikkut anguniarneqarpoq piffinni aqutsisoqarfiusuni tamakkiisumik pisassiissutigineqartartut malinneqarnissaat taamaasiortoqarneratigut nungusaataanngitsumik periuseqarluni aalisartarneq toqqammavigineqartussanngortillugu. Pisassiissutit qaammatit pingasukkaarlugit agguarnerisigut aasaaneranilu aalisarnerup killilersimaarneratigut pisassiissutit siamarneqassapput taamaasillunilu aalisarnerni aningaasarsiorsinnaaneq ukioq naallugu ingerlanneqarsinnaalersillugu. Tamatumalu aammattaaq aasakkut sulisussaaleqisarnerup kinguneranik aalisakkanik ilarpasuunik kasiilliisoqaqjaasoqarnera pakkersimaarsimassavaa.

Apeqqutinut 5 aamma 6-imut

Upernaviup eqqaani 2011-mi tunitsivimmik umiarsualiinissamik qinnuteqaatit sisamat maannakkumut tiguneqareersimalerput:

- *Arctic Greenfood ApS* Upernaviup eqqaani qaleralinnik pisiortornissamik tunisassiorfiutigisumik umiarsuarmik tunitsivilinissamik qinnuteqarpoq. Qinnuteqaat suliarineqarpoq.

- *Halibut Greenland/Polargodt* Upernaviup eqqaani qaleralinnik pisiortornissamik tunisassiorneraqaanngitsumik umiarsuarmik tunitsivilinissamik qinnuteqarpoq. Qinnuteqaat suliarineqarpoq.

- *Uummanaq Seafood* Uummannap Upernaviullu eqqaani tunisassiornerataqanngitsumik angallammiit angallammut pisanik nuussisarnissaminut akuerineqarnikuuvoq.

- *KNT ApS* piffimmi annertuumi Upernaviup eqqaa ilanngullugu umiarsuarmik tunitsiviliinissaminik qinnuteqarpoq. Ingerlatseqatigiiffik aalisakkanik assiginngitsunik tassunga ilanngullugit qalerallinnik pisiortornissamik qinnuteqarpoq. Ingerlatseqatigiiffiup erseqqissumik nalunaarutigisimanngilaa tunisassiorneratalimmik qinnuteqarnerluni, taamaattumik ingerlatseqatigiiffik piumaffigineqarpoq qinnuteqaatini erseqqissaateqarfigeqqullugu. Ingerlatseqatigiiffiup akissuteqarnissaa utaqqimaarneqarpoq.

- *Qeqertaq Fish ApS* Upernaviup Uummannallu eqaanni qalerallinnik pisiortornissamik tunisassiornerataqanngitsumik umiarsuarmik tunitsiviliiniarluni qinnuteqarpoq. Qinnuteqaat suliarineqarpoq.

Apeqqu 7-imut

2009-mi 2010-milu Upernaviup eqqaani umiarsuarmik tunitsiviliinissamik qinnuteqartoqarsimavoq.

Apeqqu 8-mut

Umiarsuamik tunitsiviliinissamik qinnuteqaatit ataasiakkaarlugit nalilersorneqartarput umiarsuarmik tunitsiviliinissamat piumasaqaatit tamakkiisut Naalakkersuisunit juli 2009-mi aalajangersarneqarsimasut tunngavigalugit kiisalu piffissami pineqartumi aalisarnerup qanoq ingerlanera aallaavigalugu.

Tamatuma kingunerisaanik umiarsuamik tunitsiviliinissamat akuerineqarnissamik qinnuteqaatit tunngavissat ataani allassimasut aallaavigalugit tulleriinnilersomerilu malillugit nalilersorneqartarmata:

1. Piginnittuunermut tunngasut.
2. Nunami tunisassiorfiuteqarneq.
3. Tulaassinermi akitgittinneqartut.
4. Piumasaqaatit allat.

Nalinginnaasumik piumasaqaatit ilanngullugit nassiunneqarput.

Apeqqu 9-mut

Qalerallit eqqarsaatigalugit Naalakkersuisut aalajangernikuupput sinerissap qanittuani qalerallinniarnermi sippulimmik tunisassiorfeqartoqannginnissaa pinaveersaartikkumallugu 2011-mi umiarsuarmik assartuutiliinnissat tunitsiviliinissallu aallaviatigut mattusimaneqassasut. Ilaatigooriarlunili unammilleqatigiinnermut tunngasut salliutinneqarsinnaasarsinnaasapput. Qinnuteqaatilli ingerlaavartumik isummerfigineqartarput piumasaqaatillu siuliani saqqummiunneqartut tunngavilugit nalilersorneqartarlutik. Tamannalumi tunngavigalugu *Uummanaq Seafood* Uummannap Upernaviullu eqqaani tunisassiornerataqanngitsumik angallammiit angallammut pisanik nuussisarnissaminut akuerineqarsimasoq.

Inussiarnersumik inuulluaqqusillunga

Ane Hansen  
Ilanngussa

**Umiarsuarnik tunitsiviliinissamut akuerineqarnissamik qinnuteqaatit suliarineqartarnerini piumasaqaatit tamanut atuuttut**

(Taakku isummernissamut tunngavissiaq 12. april 2007-imeersoq naapertorlugu Naalakkersuisuussimasunit akuerineqaqqaarput isummernissamullu tunngavissiaq 17. juli 2009-meersoq naapertorlugu Naalakkersuisunit akuerineqaqqillutik.)

Umiarsuarmik tunitsiviliinissamik angallammi tunisassiorsinnaalluni akuerineqarnissamut qinnuteqartup piumasaasut arlallit naammassisimassavai:

**1. Piginnittuunermut tunngasut.**

Periarfissat makkua immikkoortinneqarsinnaapput:

1. Qinnuteqartoq kalaaliussaaq siunertamullu kalaallit angallataat atussallugu.
2. Qinnuteqartoq kalaaliussaaq siunertamullu allamiut angallataat atussallugu.
3. Qinnuteqartoq nunami allamiuussaaq siunertamullu kalaallit angallataat atussallugu.
4. Qinnuteqartoq nunami allamiuussaaq siunertamullu nunami allamiut angallataat atussallugu.

Angallammik piginnittoq imaluunniit attartortoq Aalisarnej pillugu Inatsimmi § 6-imi periutsit eqqortissavai. Tassa imaappoq umiarsuarmik tunitsiviliinnginnermi piginnittoq attartortorluunniit tassaassaaq inuk, ingerlatseqatigiiffik imaluunniit ingerlatseqatigiiffik pisortanit pigineqartoq (ingerlatseqatigiiffik Namminersorlutik Oqartussanit piginneqataaffigineqartoq), aalisarnermik inuussutissarsiuteqarnissamut tunngaviusunik eqqortitsisoq.

Tamatuma kingunerisaanik qinnuteqartut nunani allamiut akuerineqarsinnaanngillat kalaallit nunaniluunniit allamiut angallataat siunertamut atorniaraluarunikku, tassami tamanna Aalisarnej pillugu inatsimmi § 6-imut akerliussammat. Taamaattumik periarfissat 3, 4-lu peerput.

Saarullinnik pisiortortussamik umiarsuarmik tunitsiviliinissamut marlunnik arlalinnilluunniit qinnuteqaateqartoqarpat sumiiffimmut piffissamullu tassungarpiaq tunngasut qinnuteqartup attartortulluunniit kalaallit angallataannik atuniartoq salliutitaassaaq.

**2. Nunami tunitsiviit.**

Nunami tunitsiviit inuiaqatigiinni kalaallini aningaasaliinerupput annertuut maani nunami suliffissanik qulakkeerinnittut. Periarfissat makkua immikkoortinneqarsinnaapput:

1. Qinnuteqartoq nunami suliffeqarfiuteqarpoq ukiorlu tamaat tunitsivigineqarnissaat ammatillugu. Qinnuteqartut taakku tamatigut salliunneqartassapput.

2. Qinnuteqartoq nunami suliffiuteqarpoq taakkualu ukiup ingerlanerani piffissat ilaanni ammatittarlugit. Qinnuteqartut taakku tamatigut tullinnguunneqartassapput.
3. Qinnuteqartoq nunami suliffiuteqanngilaq. Qinnuteqartoq nunami suliffiuteqanngitsoq nuussinissaminut akuerineqarpat qinnuteqartumut nunami suliffiutilimmut sanilliullugu unammilleqatigiinnerat equinneqassammat, qinnuteqartoq nunami suliffiuteqanngitsoq pingaarnersiuiinermi pingajuutinneqassaaq. Sumiiffimmi nunami tunitsivissaqareersumi qinnuteqartoqarpat taamaallaat nuussinissamut akuersissummik tunniussisoqarsinnaavoq nunami tunitsiviit tunisassiat tulaassorneqartut naammassisinnaanngippagit. Aalisarfinniit assartuisoqarsinnaanera nalilersorneqarsinnaavoq.
4. Qinnuteqartoq nunami suliffiuteqanngilaq neriusaarutigaluguli nunami suliffeqarfiliornissani. Qinnuteqartoq nunami suliffiuteqanngippat, qinnuteqaamminili piffissap aalajangersimasup ingerlanerani suliffeqarfiliornissani neriorsuutigalugu, taava allamut usingiarnissamut akuersissummi erseqqarissumik allassimasariaqarpoq, akuersissut neriorsuummut atalluinnartuusoq.
  - Sumiiffiit ilaani tassanerpiaq angallammi tunisassiassanik angallammut allamut usingiartarnissamut akuerineqarnissamik qinnuteqartut ataasiuppat arlaqarpataluunniit qinnuteqartoq nunami ukioq kaajallallugu tunitsivittut ammasumik suliffiuteqareersoq sallerpaatinneqassaaq.
  - Qinnuteqartoq ukiup ilaani ammatittakkamik suliffiuteqareersoq salliutitamut tulliuussaaq.
  - Qinnuteqartoq nunami suliffiuteqariinngitsoq pingaarnersiuiinermi pingajuussaaq

Qinnuteqartoq nunami suliffiuteqariinngitsoq piffissalli aalajangersimasup ingerlanerani taamaattumik suliffeqarfiliussamaarnerartoq angallammut allamut usingiartarnissamut akuerineqassappat akuersissummi tamanna erseqqissumik allassimassaaq, tassalu suliffeqarfiliornierup piviusunngortinneqarnera nuussinissamut akuersissummik pigisaqarnissamut tunngaviusoq.

Ataatsimut isigalugu taamaallaat umiarsuarmik tunitsivimmik inissinissaq akuerineqassaaq nunami nioqqutissiorfik naammassisaqarsinnaanngippat naammassisaqarsinnaa-neraluunniit amigarpat.

### **3. TunSAT akii.**

Periarfissat makkua immikkoortinneqarsinnaapput:

1. Qinnuteqartoq nunami tunitsivimmit unammillikkaminit imaluunniit angallammut allamut usingiartarnissamik qinnuteqartumit unammillertiminit tunisanik akigissaartitsineruniarluni pilersaaruteqarpoq. Taamaattoqartillugu unammilleqatigiinnermi uuttuutit malillugit aalisartunut iluaqutaanerusut salliutinneqartassapput.
2. Qinnuteqartup pilersaarutigaa nunami suliffeqarfioeursutut imaluunniit allamut usingiartarumallutik qinnuteqartut unammillertimisut tunisanut akiliisarumalluni. Taamaattoqartillugu taamaallaat akuersissut eqqarsaatigineqarsinnaavoq tunitsivik piousoq tunisassianik tigusisinnaanngippat. Tunitsivik piousoq tamatigut tusarniaavigineqaaqartassaaq piffissami sorlermi ulapaarfiunersaasarnersoq.
3. Qinnuteqartup pilersaarutigaa nunami suliffeqarfioeursumit unammillertiminit allamut usingiartarnissamik akuerineqarumalluni qinnuteqartumit unammillertigaminit tunisat akikinnerutinniarlugit.

Taamaattoqartillugu taamaallaat akuersisummik tunniussisoqarsinnaavoq sumiiffimmi nunami tunitsivik tunisassianik tulaassorneqartunik naammassisaqarsinnaanera amigarpat.

- Nunap immikkoortuani tassanerpiaq angallammi tunisassiassat angallammut allamut usingiartarnissaannut qinnuteqaammi qinnuteqartoq ataaseq arlallilluunniit pineqartillugit qinnuteqartoq nunap ilaani sumiiffimmi tunisisarfimmit unammillersumit annerusumik akeqartitsiniarteq sallerpaatinneqassaaq.
- Qinnuteqartut nunami tunitsiviereersut assingannik tunisanut akeqartitsiniartut pingaarnermut tulluutinneqassapput, taamaattoqartillugu allamut usingiartarnissamut taamaallaat akuersisoqartassaaq tunitsiviit nunamiittut tikiussat tamarmik suliarinissaannut ajornartorsiuteqarpata.
- Qinnuteqartut nunami tunitsivimmit unammillikkaminnit imaluunniit allamut usingiartarnissamut akuerineqarnissamik qinnuteqartunit tunisinermit minnerusumik akiliiniartut allamut usingiartarnissamut taamaallaat akuerineqarsinnaapput sumiiffimmi nunami tunitsivik tunisassiassat tunineqartut suliarinissaannut ajornartorsiuteqarpata.

Piumasaqaatit allat:

Umiarsuarmik tunitsiviliinissamut akuersisoqassappat piumasaasut allattaaq arlallit naammassineqarsimallutillu naatsorsuutigineqarsimassapput:

1. Aalisagaq qinnutigineqartoq:

Aalisakkamut aalajangersimasuinnarmut akuersissuteqartoqassaaq. Uumasuseqatigiit eqqarsaatigalugit tamanna imminut illersorneqarsinnaasuusaaq. Tamatuma peqatigisaanik qulakkeerneqassaaq pisat pisassiissutinit amerlanerussanngitsut. Aalisagaq qinnutigineqartoq soorunami angallammi tunisassiornissamut akuersisummumut naleqquttuusaaq.

2. Sumiiffik / kommune qinnuteqarfigisaq:

Akuersissut taamaallaat nunap immikkoortuanut kommunimulluunniit ataatsimut tunngatillugu tunniunneqassaaq. Nunap immikkoortuanit kommunimulluunniit arlalinnut annertunerusumik akuersissutiginninneq taamaallaat pisassaq aalisakkanik ilisimatuut siunnersuinerat, tamakkiisumik pisassat, tunitsivinni nunamiittuni pissutsit tunisinermilu akigititassatut ilimasaarutigineqartut tunngavigalugit tamanna ajornanngippat pisariaqarpalluunniit.

3. Piffissap qinnutigineqartup sivissusua:

Akuersissut taamaallaat piffissamut sukumiinerusumik sivissusilikkamut tunniunneqassaaq. Piffissaliinermi tamatumani sumiiffimmi kommunimilluunniit qinnuteqarfigisami pisanik tunisinermi pissusiviusut aallaavigineqassapput, taamaalilluni tunitsivinnut nunamiittunut unammillerneq pileqqunagu.

4. Biologit inassutaat:

Ataatsimut isigalugu akuersissut taamaallaat tunniunneqassaaq aalisakkat katillugu pisassat biologit inassutaannik amerlisitsinngippata.

5. Eqaatsumik periuseqarneq:

Qinnuteqartoq attartortorluunniit umiarsuaq angallataatini tunitsivik aalisartut pisariaqartitaat malillugu eqaatsumik nuussinnaassuseqartoq salliutinneqassaaq qinnuteqartunut taamatut eqaallisaanissamik qinnuteqartuunngitsunut sanilliullugu.

6. Umiarsuarmi tunisassiornissamut Fødevarestyrelsimiit akuersissut:  
 Qinnuteqartut tamangajammik umiarsuarmi tunisassiornissaq aamma qinnutigisarpaat, taamaattumillu ataatsimut isigalugu pisortaqaarfiup allamut usingiartarnissamut akuersinissamut umiarsuarmi tunisassiornissamut akuersinissaq ilanngullugu inassutigisarpaa. Taamaattumik umiarsuarmi tunisassiornissamut akuersissutip assilinera tamatigut nassiunneqassaaq, taannalu taamaallaat Danmarkimi Fødevarestyrelsimiit (Fødevareregion Nord i Ålborg) tunniunneqassaaq. Nunani allamiut angallataannut tunngatillugu nunani allani tamakkunani pisortat akuersissuteqartarput. Suliffeqaarfiup inuussutissanik nioqqutissiornissaata piunasaqaataaneranut tunngaviuvoq "nioqqutissat inuussutissat il.il. pillugit inatsisip Kalaallit Nunaannut atortussanngortinnissaa pillugu peqqussut nr. 523 8. juni 2004-meersoq" aamma "Akuersissuteqarneq pillugu nalunaarut".
7. Aningaasatigut tunngavissat:  
 Qinnuteqartoq inuk kisimiilluni namminersortuuppat uppersararneqassaaq inuk pineqartoq aningaasanik isumalluuteqarluartoq. Qinnuteqartoq selskab-iuguni selskab-iussaaq pilerseriigaq. Qinnuteqartoq selskabiuppat pilersinneqaaqaaq pilersaarutip akilersinnaassusia aningaasatigut nassuiaatikkut immikkoortortalersorluakkakut uppersararneqassaaq. Tamannali piunasarineqassanngilaq allamut usingiartarnissamut akuersissutip sivitsornissaani.
8. IUU-p angallatai:  
 Angallatit IUU-mi (IUU = unioqqutitsilluni, nalunaaruteqarani killilersugaanngitsumik aalisarnerit) atorneqarsimasut akuerineqassanngillat.
9. Aalisarnermut Akuersissutinik Nakkutilliiveqarfimmut (KANUAANA) paasissutissiat:
- Qinnuteqartup angallammik piginnittuunermut pissutsit kiisalu najukkat nunamillu sumit pigineqarneranut uppersararfaat nalunaarutigissavaa. Taakku saniatigut tunngavissat makku eqqortinneqassapput:
    - Angallatip angissusianut uppersararfaat nassiunneqassaaq
    - Nalunaarsugaanerata normua nassiunneqassaaq
    - Nalunaarfigineqaruni ilisarnaataa nassiunneqassaaq
    - Kalaallit Nunaanni inuup angallat pillugu attavigineqartussaaq, tassunga ilanngullugu atia, adressia, telefonia, faxia aamma e-mailiata sumiiffia nassiunneqassapput
    - Umiarsuup KANUAANA-llu akornanni attaveqatigiinnermi kalaallit, danskit tuluilluunniit oqaasii atorneqassapput.
  - Angallat satelitikkut pisariaqartunik atortorissaruteqassaaq angallatit aalisariutit satelitikkut nakkutigineqarnissaat pillugu Namminersornerullutik Oqartussat nalunaarutaanni nr. 21-mi 30. maj 2001-imeersumi aalajangikkat malillugit. Immikkut eqqaamaqquneqarpoq § 3, taanna malillugu angallatit nalunaarummut ilaasut FOE pigissammassuk FOS-illu ataaniissallutik. Angallat ingerlatsilersinnagu KANUAANA-p akuerissavaa FOE-mit attaveqarneq nalunaarummi piunasaasunik naammassinninnersoq.
  - Angallat ingerlatsinermut, sapaatip akunnerinut ingerlatsinnginnernullu nalunaaruteqassaaq umiarsuaq aallartippat, ingerlatsippat tunisinerillu naammassineqarpata umiarsuit aalisariutit avataasiutit nakkutigineqarnerat pillugu Namminersornerullutik Oqartussat

nalunaarutaat nr. 9, 15. april 1996-imeersoq malillugu aamma KANUAANA-p annertussusissatut aalajangigaa malillugu.

- Angallatip sapaatip akunneri tamaasa tunisaqartut/pisiat amerlassusiat KANUAANA-mut nalunaarutigissavai annertussusissat KANUAANA-p aalajangigai naapertorlugit.
- Angallatip usilersuussinermut uppernarsaatit usilersuussaat umiarsuarmulluunniit allamat nuunneqartut amerlassusiat KANUAANA-mut nalunaarutigissavai.
- Sumiiffimi sulisussat sulinissat piumasaasimappat ingerlatsinerit pillugit nalunaarutini inuttaqassutsimut nalunaarsuutit KANUAANA-mut nassiunneqassapput. Inuttaqassuseq allanngorpat inuttaqassuseq pillugu nalunaarsuut nutaaq nassiunneqassaaq.